

# De Kwakel

CV de Moerebuuk  
Jaorgank 59

Prins Jeroen I  
Prinses Claudia



Pleunis oppe helle

Blz. 4

Neet poetc mer lulle

Blz. 8

Zaathermenicke

Blz. 11

Ein zwaor bevalling

Blz. 7

Ratteplaog in Èll

Blz. 13



Jeugdprins Tim  
Jeugdprinses Lynn

Vastelaovendj 2024

# De Kwakel

## Proclamatie

CV DE MOEREBUUK  
Jaorgank 59

DE MOEREBUUK

Ich, prins Jeroen de 1 ste , 73 ste Prins vanne Moerebuuk, jongste en knapste zoon van Frans van de Bös en Gerda Derks, en broor van Roy.

In 1978 gebore in buurt Niesstraat/Hoverwei en op 10 jaorige leeftied verhoestj nao 't prachtige Spargelheukske.

Dao woeën ich vandaag de daag nog steeds mèt völ plezeer same mèt mien Prinses Claudia (gebore in 't Walvaegersiek) en ós twieë zeuns Len en Noud.

In 't dageliks laeve rie ich met mien buske gans Limburg door en bezeuk ich AVIA-tankstations veur óngerhaod en oppe woondig bén ich te vinje in de Kruikenstad (Tilburg) woeë ich op 't hoofdkantoeér miene baas van gooij advizee veurzeen.

In miene vrieje tied bén ich hieël mien laeve al op 't voetbalveldj te vinje. Lange tied bie RKESV..., 'n klein oetstepke nao Veritas ..., en tegewoordig bie DFO'20 in Kelpe. Dao gaef ich door de waek de jeugd voetballes en op dónderdig lieér ich de veterane van Kelpe, Hunsel en Grathem wie 't mó. Op zaoterdig coach en grouwel ich get op de jeugd en op zunjig sjitter ich in 't vlaggesjeep van DFO'20, de veterane 1. Daonaeve bén ich ein groeët fan van de bëste club van Nederlandj, PSV!

De 3 e helft bén ich op mien sterkst. Neet allein in de kantien van de voetbalclub, mer ouch in die van de tennisclub, woeë ich gaer 'n pötje tennis speul en ein speciaal beerke drink.

As d'r örges in Èll un fieëstje is, dèn zeen wae same mèt mien adjudante, Jeroen, Stefan en Josh en de dames Anita en Marianne meistal waal vanne partie. En dèk kinne wae meujelik heives gaon.

Vastelaovendj vere zitj ós in 't blood. Mien pap en sjoeënpap zeen allebei prins gewaesj. Mien broor is jeugdprins gewaesj en miene aodste zoon kleuterprins.

Zelf waas ich 20 jaor geleje adjudant van prins Stefan de ieérste. Ouch zeen we 11 jaor lid gewaesj van de Raod van Elf. Det waas eine fantastische tied!

Noe ben ich zelf aan de beurt óm veurop te goan. En ich kan uch zègge: WAE HÖBBE D'R ZIN IN!

Bie de gratie van Groeëtvorst Jan, Groeëtvorst Henri, Vorst Steef en de Raod van Elf wil ich uch 't volgendje zègge:

- Det miene wins óm prins te waere noe is oetgekómme.
- Det wae same mèt de jeugdprins, jeugdprinses, heur adjudante en de jeugdraod d'r ein geweldjig fieëst van gaon make. Wae zulle mörge zeen weem det is. Kómtj mörge dus ouch allemaol nao 't oetrope van 't jeugdprinsepaar!
- Det wae same mèt ós adjudante Jeroen, Stefan, Josh en de dames Anita en Marianne d'r eine fantastische vastelaovendj van gaon make.
- Det dit zeker geit lökke mèt de geweldjige óngersteuning van de men en dames van de Raod van Elf!
- Det wae de Èller muzikante vraoge dit jaor ouch weer te zörge veur geweldjige live-muziek!
- Det wae ederein oprope óm dit jaor te zörge veur eine te gekke optocht met völ knauwel en flauwe humor van einselgangers, duo's, kleine en groeëte groepe. Óngersteundj door sjoeën
- Det ich noe al benoedj bén waat Bas Moeëne, Maarten Bombeeck, de Sjrumpelkes inclusief Nicol Orbon en die sterre vanne veterane gaon doon mèt de optocht, gae mójt nog anom.
- Det ich hoop det zelfs de minse mèt ein Ajax-hert tiedes deze vastelaovendj ouch plezeer kónne belaeve. Veural de manne van ós Londen-grupke en die van 't 3e!
- Det ich de prins wil zeen veur groeët en klein, aod en jónk!
- Det ich dit jaor gaon regere in de orde van 't Buske!

Ich wil uch allemaol 'nne geweldjige vastelaovendj winse en ich gaon aafslöete ónger mien motto:

Diesel en benzien aan de kantj,  
mèt Böske volle gaas door 't Moeërelandj!



## Leef Moerebuuk

't Is zunjig 8 oktoeëber 2023 en wae höbbe dae daag neet veul geplandj. Ich móst zelf voetballe en Claudia ging eine daag nao de sauna mèt ein vriendin óm lekker te relaxe en bie te kalle.

Wae móste voeballe tegen SV Maarheeze en den wèts se det det eine pittige wèdstried weurtj en zoeë waas 't ouch, wae verlore nèt mèt 1-2 en de zin waas neet al te bést in 't kleidlokaal.

Nao de douche waas ich ein van de lètste oet 't kleidlokaal, nog balendj van de wèdstried. Toen ich de kantien in leep kwoom Steef op mich aan, "kóm ins mèt, ich módt dich get laote kieke" zag t'r. Ich leep met Steef mèt óm te kieke waat d'r waas. Steef hoolde de telefoon oet de tes en lieëtj mich ein foto zeen van 't dreibook van 't prinsecomité. Ich snapdje, nao 2x kieke, drek waat d'r móts, mer ómdet 't erg drök waas wis ich neet precies waat ich d'r mèt aan móst. Mien geveul ging van "bale nao de verlore wèdstried" direct óm nao ein lachendj gezicht en ein opgewónje geveul van binne. Ich waas mich ieërlík gezagt ouch echt kapot versjrókke! Ich wist waal det ich det al jaore zoeëj wille, dus as ze dich den vraoge is 't antwoord simpel.

Nao det de ieërsste spanning gezaktj waas höbbe Steef en ich ós ein pötje beer besteldj en höbbe zónger det emes get in de gate haaj d'r nog efkes euver doorgekaldj en aafgesproke det Steef mich de daag d'rnao ging belle. Ouch nateurlik ómdet ich Claudia neet kos bereike in de sauna. Naodet ich mèt de veterane nog get potte beer höb gedrónke, en óm de foute in de wèdstried höb gelache, bén ich op 't fietske nao hoes gegange. Dao bén ich de hieële middig aan 't dinke gewaesj. Wie gaon wae dit aanpakke, waat módt ich aan, wie zal det in zien werk gaon, enz enz... Róndj 7 oor apptj Claudia "wie is 't vandaag gegange?". Ich höb trök ge-apptj "t waas eine zwaore daag".

Toen ze thoes kwaam vroog Claudia drek waat d'r waas gewaesj en ich zag det Steef mich gevraogdj haaj. De reactie van Claudia waas top, ouch zie begos te lache en toen wis ich det 't waal good zoot. Ich höb de nacht d'rnao 3 eurkes geslaope. 1000 dinge spoeëktje michinne kop! Steef beldje mich maondjig mórgé en uiteraard höb ich toen drek JAO gezagtj! As ieërsste ging ich de adjudante vraoge. Die móste lache mer zagte drek ouch 'Jao wae doon mèt'.

Det waas 't begin van eine spannendje en eine hieële sjoeëne veurbereijing. 't Waas veural meujelik óm neet altied ieërlík te zeen tege de jónges thoes. Gelökkig moog noe ederein 't weite, 't geit noe pas echt beginne!

Ich wins ederein 'nne super vastelaovendj mèt allein mer lol en plezeer, want dao geit 't tenslotte óm en det gaon wae doon ónger mien motto:

**Diesel en benzien aan de kantj, mèt Böske volle gaas door 't Moeërelandj!**

## Wisj dj'r al..

- det Jurre mèt de vastelaovendj flink op stap waas gewaestj?
- det hae snachts ane receptie van Lemmehof stóng.
- det Roger zich oet bed haosdje óm de noewe gaste te verwelkome.
- det de camping volgebooktj waas, dus det Jurre gewuuuen in zien eige bed geslaope heet.
- det Nell bie 't paosstökskes make vanne vrouwebónjdj veural zaat te kletse en neet zoezieér aan 't oplétte waas.
- det ze 'n tekske paktje, det oppe goje gok in 't bloomstökske duudje en mèt een hel "voila!!" de aandacht van de hieële groep vroog.
- det ze hieëlemaol de aandacht haaj, toen bleek det 't neet heur eige bloomstökske waas.





# B&B Linje

EIN LEKKER BÈD EN GOOD ÓNTBIJT  
KÓNTJ GAE VINJE BIE B&B LINJE.

ANTONIUSSTRAOT 30 - 06 23091968

## Verkieërdje plek

Anita waas 50 gewore en det gingé ze mèt ein stèl vroulje in Scheveningen vere. Aafgesproke waas, det ederein zelf gete drinke veur óngerweeg mèt zooj pakke. Det lèste haaj Marianne neet mètgekrege, "O nein, det wist ich neet!" Mer geine paniek, op 't station in Wieërt kocht ze 'n fleske water, stopdje det in heur noew, zwarte, suede tas en de reis kost beginne. In Scheveningen aangekómme gingé ze ieést effe opfrisse in 't hotel. Marianne zat heur tas op de leechte vloerbedèkking en sjoot inne stress: d'r zoot een plek op heur boks! Dus ze pakdjé heur tas, zat die op 't bed, vèsdje d'r ein deukske oet en vaegdje de plek van heur bóks aaf. Det lökdje redelijk good, dus Marianne waas tevreje. Mer toen pas waas de paniek écht dao, want op de vloer en ouch op 't witte bèdddegood zote zwarte plekke!! Ze vaegdje en sjoordje, mer ze kreeg de plekke neet wèg. "Det gaon ich toch mer effe meldje bie de receptie." Of die de plekke wèg hòbbehé gekrege weite wae neet, want Marianne heet 't verkieërdje kamernummer doorgegaeve...



**FERMATE**

Muziekproducties • Dirigeren • Arrangeren • Componeren •  
Producieren • Registreren • Presenteren •  
Dialectpop • Artiestenbegeleiding • Projectcombo •  
Advies m.b.t. muziekprojecten • 'Studio Linje'

06-55703344 • INFO@FERMATE.NL • WWW.FERMATE.NL

## Op dae fiets

Frank van Miet haaj de bandj van ziene fiets kepot. Dae waas al aardig kaal dus dao móst eine noewe op. Bie de fietsemaker aangekómme veel Frank zien oug op eine angere fiets dae dao inne zaak stóng. Nondedju, det waas eine sjoeëne! Hae dacht neet lang nao, ruuldjé ziene kapotte fiets in en fietsdjé effe later op ziene noewe fiets weer trök nao hoes.



**Wisj dj'r al..**

- det 't KVW mèt groep 6,7,8 nao de Tungelderse wel ging
- det Owen al aanreej, want hae wist de weeg
- det Owen de Tungelderse wel en de Houtsberg doorein hooldje
- det de kinjer daodoor 't halve spel hòbbehé gemistj.

## Niks ane handj

Eric Heijkers waas nao Suriname gewaesj en kwaam net oppe tied trök, óm mèt de Koalderbend mèt te kónne blaoze. Det Eric oppe valreep thoes waas en drek paraat stóng, waas ouch Jan van Linje ter oeëre gekómme. Jan zocht Eric op en vroog hum of Eric, nao eine nacht euverslaon en zoeë lang in 't vleegtuug, gein last haaj van eine whiplash. "Nae," zagt Eric, "en ouch neet van eine jetlag, as se det soms bedoels."



## HAMERDJE DE PLANK MIS

Aod prins Micky ging veurig jaor veurop ónger zien motto: "Fieëstj vandaag, dinktj neet aan mörge, want de man mèt de hamer zal uch koppien bezörge!" In de optocht kwaam zien motto regelmaatig aan de orde. Francine vanne bekker stóng langs de kantj te genete van de optocht, tot ze vroog: "Waat is det toch mèt dae hamer. Dae kömtj in de hieële optocht veurbie!"



## Krap aan

Bram waas smurres mèt zien dochters opgestange. Hae haaj ze gewasse en de kleijer aangedaan. Toen Sandra ónger kwaam zagt Bram: "Die rompertjes van Jolie beginne echt waal klein te waere, hè?" Wie Sandra nao de romper van Jolie keek, zaag ze drek woeë det aan laag. Bram haaj Jolie de romper van baby zusje Noé aangetoemeldj, maot 62 in plaats van 92.



## Waat 'ne brave

James en Chantal höbbe ein noew hondje, ein kruusing tösse 'n teckel mèt 'ne labrador. Wie ze aan 't wanjèle wore kwome ze Tim Benders tege: "Waat eine leuke hondj! Haetj dae Jur?"



### Joost, de super fan

Sinds 'n paar jaor voetbaltj Maud bie DFO. Ze haaj al hieël dèk aan Joost gevraogdjm óm ins nao 'nne wedstried te kómme kieke. Joost woeëj d'r veur zörge det t'r mer eíne kieér hoofdje te gaon en maaktje ein spandoek. Dae dacht: Maud sjaamt zich kepot en den ben ich d'r van aaf. Wie Joost halverwege de twieëdje helft aankwaam zaat Maud oppe bank, dus Joost ging d'r zich binne eine drinke. Oeteindelik heet t'r Maud neet zeen voetballe en waas ze al thoes terwiel Joost nog inné kantien zaat.


### veiligheid veur alles

Bove in de gank veel de roukmelder vanne plafón.  
"Ach, wat maaktj det oet," zeet Josje,  
"woeéróm módt dae ouch altied aan  
de plafón hange?!"



### TANTE NELLIE

Ter ieëre van heur jubileum haaj de fanfaar ein pilske laote brouwe: CentenniEll. Oppe Bontje Aovendj waerdje dao aandacht aan gesjónke, mer waerdje de naam verbasterd tot SentjesNell. Henri waas ónger de indruk en vroog aan Huub: "Höbs dich ein tante die Nellie hèjt?" Huub meindje det Henri hum veur de gek heel mèt zien vraog: "Jeh nae, det is Nell van ós Koos!"



### Pleunis oppe helle

Esther ging mèt ein aantal Pleuniszusjes nao de Welfair in de Brabanthalle. Dao haaje ze 't veural erg drök mèt minse kieke, preuve en koffie drinke. Óngerweeg krege ze eine 'goodiebag' inne henj geduudj. De dames nómme dees tas mèt folders aan en höbbe dao de ganse middig mèt róndj gesleiptj. Einmaol thoes wore ze toch waal benoedj waat allemaal in die tas zoot. Toen kwome ze tot de conclusie det die vol zaat mèt reclame veur seksspeeltjes.



**SPAR DERKSEN**  
SEBASTIAANSTRAAT 12  
6011 RE ELL 0495-551285



**BAETS**  
Handel & Transport



### Willemie is neet thoes

Maureen, de vriendin van Joeri, woeëj gaer 'n naambordje veur ane gevel van heur huuske in Kelpe. Zeeë gezagdj zeeë gedaon en dit bestèldj via ein site. 't Kwaam diezelfdjie waek nog binne, mer d'r waas 'n probleem. Maureen heet 't veurbieëldj van de site neet aangepastj, mer gewuuen bestèldj. Noe heet ze dus 'n bord ligge mèt 'hœsnr 24 Willem en Sanne'.



## INTERVIEW VORST STEEF

Ha Steef, zulle we ós drek get drinke d'r bie pakke noe se er toch bës, want wae van 't Kwakelcomité wille get mieér wete euver dien ieëste jaor as Vorst.

### **Veurig jaor is d'r 'nne Vorstwissel gewaestj. Vertèl ins, wie waas dae daag veur dich?**

In ein woord geweldzig! Missjen nog waal mieér ómdet d'r nao 'n aantal jaore 'anges' vastelaovendj vere door de corona, deze aovendj de aaftrap waas van weer 'n normaal vastelaovesseizoen. Wie zich det huuertj; 'n geweldzig (jeugd-)prinsepaar mèt heur gevolg en det in combinatie mèt weer live vastelaovesgeveul in ós sjoeën Moeërelandj.

### **Höbse dit altied al wille doon? Waas 't eine droum?**

As kleinkindj van opa vanne Sjilder, oprichter en ieëste Vorst van de vereiniging, is 't nateurlijk ein ieér asse door 't bestuur gevraogdj weurst of desse Vorst Henri wilst opvolge. Det 't eine volmondige 'jao' zoeëj waer waas waal zeker. Al mótt ich dao Carolien ouch alle credits veur gaeve; want ieërliek is ieërliek, wae haaje pas ós noew hoes gekocht oppe Antoniusstraot, ós twieëdjie zeunke Don waas op komst en den is Carolien nateurlijk ouch nog 'nne rasechte vastelaovesveerde. Den móssse 't dao nateurlik waal effe euver höbbe.

### **Welk moment waas veur dich 't sjoeënste in det seizoen?**

D'r zeen in ein seizoen ongeluiflik veul sjoeën momente, van 't oetkómme vanne (jeugd-)prinsepare tot aan 't aaftræje en alles dao tösse-in. Ich dink det eder activiteit weer ein sjoeën moment mèt zich mètbringtj. Al wil ich de vastelaovesvering op zunig waal benaodrökke, ómdet dit óngerhalf oor altied ein biezunjer moment is, woeë-op wae allemaol effe stilstaon. Ein vastelaovesseizoen kénmerktj zich altied door hieël veul lache en aaf en toe 'n gemeindje traon; det meuktj 't ouch zoeë puur!

### **Wat num sè mèt van dien veurgangers?**

Mien veurgangers woeë-det ich 'n 'actieve herinnering' aan höb (Goh, woeë höbbe wae dae term mieér gehuuerdj), zeen toevaligerwies ós beide Groëëtvorst Jan en Henri. Van zoewaal Jan as van Henri numse bewustj en ónbewustj eine brok aan vastelaoveskinnis mèt. Ich dink det ziej allebei zulle beame des se eine goje Vorst probeerst te zeen, asse in eder geval kort biej dich zelf bliefst en d'r 'nne eige dreij aan geufst. Zoëëwal Jan as Henri zeen dao 't laevendj bewies van en det heet altied good oetgepaktj!

### **Wie kieks se nao 't kómmendj seizoen?**

Ich dink det eder vastelaovesseizoen 'te kort' is, zeker inne belaeving van 'nne Prins. Mer dit jaor is 't ouch nog lètterlik zoeë. Des te mieér reje óm van eder minuut te gaon geniete, want veur desse 't wètst, is 't... Juust jao, neet aan dinke nog!

*Danke Steef veur dit sjoeën gesprek! Danke veur de gastvrijheid, ich zal waal aafwasse. Op 'nne gooje vastelaovendj same!*

## VOETPUNT

MEDISCH PEDICURE PRAKTIJK

### **Effe de roet**

Steef en Carolien ging 'n nachtje nao Zandvoort mèt de kinjer. Ze woeëje 'n bietje optied wègrieje vanwege 't verkieër en pakdjé de lètste dinger nog ff in.



"Höbbe we alles?" vroog Steef "Nae," zeet Carolien "die tas van de kinjer mótt nog mèt!" Steef paktj dees snel en proptj de tas op de rest van de spulle in de kofferbak. Steef duutj mèt al zien gedoldj de kofferbak flink toe en de roet zeet knak.... De roet loog ik doezendj stökskes op de tasse. 't Uitje heet hiedoor toch get vertraging opgeloupe.

### **Strepe trèkke**

't Waas vakantietied en ouch waas Èll 'Dörp van de maondj'. "Dju, den mótt ich opsjete," dacht Paul, want zien "neet-parkere-kruus" veur de oprit waas verslete en kost waal ein noew läogske vèrf gebrooke. In vakterme hètj det "ophole van ein aoj vèrflaog".

Aangezeen hae en Ana de volgendje daag nao Spanje op vakantie zoeëje gaon, besloot Paul óm ein breetke bie de sjaftkieët op 't plein in de brevebös te doon. Hae haaj gezeen det 't kruus

bie Sjaak en Annelies ouch verslete waas en, aangezeen die al wiet veur de zomer mèt de sleiphut op vakantie wore, besloot Paul óm ouch det adres te benumme: "Hallo team, A.u.b.

'niet-parkeren-kruis' ophalen bij Sebastiaanstraat 25 en 29. Bij voorbaat dank." Dus Paul mèt zien breetke nao 't plein. Dao sting waal de sjaftkieët, mer dao waas gein brevebös te vinje. Hae plekje det breetke aan de klink van de deur vast.

"Det vinje ze waal as ederein dao mèt de votvinger vanaaf blieft," dacht hae nog.

Wie Paul en Ana trök kwome van vakantie veel drek op det 't kruus op nummer 25 waal waas opgehooldj, mer veur heur eige deur 'nada'.



**Veur eine appel en ein paer  
gaotj gae nao  
fruitbedrief Moors  
haer.**

**smolenaers**

Makelaardij BV  
VBO register makelaar-register taxateur

Bij Polderte 16  
6005 SP Swartbroek  
GSM: 06-53198877  
Tel: 0495-552113  
Email: info@smolenaersmakelaardijbv.nl

CV DE MOEREBUUK  
Jaorgank 59



### Deh.. des toevallig



De familie Bongers haaj heur spulle ingepaktj en waas nao Italië gereje, want ze ginge ein paar waeke lekker op vakantie! Bie de camping aangekómme móste ze inchecke ane balie. De receptionist zooj gaer 't kinteike van de auto notere. Det wiste ze neet oet de kop, dus Max ging waal effe kieke. Wie d'r trök kwaam haaj d'r een foto gemaaktj van de nummerplaat aan de veurkantj én ein van die ane achterkantj van de auto.

Hae meindje det 't kinteiken veur angers waas as achter.

**Timmerbedrijf - Houthandel W.STEUTEN BV**

Grathemerweg 49B  
Kelpen-Oler  
0495-652178  
[www.steutentimmerbedrijf.nl](http://www.steutentimmerbedrijf.nl)

### MÈT JANNE EN KRUKE

Op de vriedig van Èll kermis waas Stef Heijkers klaor om nao Joeri te gaon. Ein aantal waeke geleje haaj d'r gevoetbaldj, woeëdoor hae noe last van de knie haaj en op krukke leep. Janne als zurgzame zus woeëj hum waal achterop mètnumme nao de kroeg. Veur vertrék vroog Stef of Janne de krukke efkes woeëj pakke. "Huh, woeëróm mos dich dien eige krukke mètnumme, Joeri heet d'r toch och staon?"



### Wisj dj'r al..

- det Jasper Linders 't zich good geregeldj haaj aafgeloupe jaor, hae haaj vrie gepaktj mèt de kirmis.
- det hae mèt die daag toch gewuuuen heet gewirkjt.
- det hae de verkieërdje waek vrie haaj, ómdet hae meindje det de kirmis altied in de ieëste waek van november vëltj.

### Waat 'n werk

De woonsdig veur de vastelaovendj ging Aylin van Steijvers op bezoek bie oma in Rooj. Ze vertildje wat d'r allemaal op het program stóng aankommendje waek: "Op vriedig gaon we mèt zien alle nao de sleuteleuverdracht en daonao kumt Moeërepetazie bie Joeri." "Dju zik, waat 'n werk", zei oma. "Weem geit det maake veur 't ganse dörp?"

### Oppe tied beginne mèt vriewilligers bie-ein te kriege

In Haler is al jaore 'n sjoeën en spectaculair TT-evenement. Dao is den zoeëveul te doon, det ze oet ómliggendje dörpe minse vraoge óm och get hendjes oet te staeke. Ouch oet Èll kómme dao minse helpe. De meiste zeen gaer bie det evenement ómdet ze van motore haoje. Zoeë och Jelle Heber. Hae hulptj al bienao 10 jaor as vriewilliger veur versjillende Vastelaovesgroepe mèt.

Veur de gewirkdjé ore kriege de vastelaovesgroepe 'n vergeujing. Jelle rietj zelf och gaer mèt inne wèdstrieje en det op eine Suzuki T500 oet 1968.

Jelle heet d'r zoeëveul lol aan, det hae en Lydie d'r veur ginge zörge det d'r opvolging waas in 't vriewilligerslegioen. Zoon Mats geitinne spore van vader Jelle en opa Peter traefje. Missjien och get veur angere óm 't veurbieëldj van Jelle op te volge. Dao zeen ze in Haler zeker blie mèt. De 10e TT van Haler is dit jaor op 19, 20 en 21 juli. Missjien och get veur uch óm as vriewilliger in Haler mèt te helpe. Same mèt Snelle Jelle. Gaeft uch snel op via de website van TT Haler.

Weem wètj zeen wae ós dao. (Gae hooftj geine aoje motor te höbbe 😊).



# 16 augustus 2024

## Waat gebeurtj d'r op dees foto

- A: Joeri meuktj ein carrièreswitch en geit de aojerezörg in.  
 B: Dit is gein echte foto, mer ein knap staaltje photoshop.  
 C: Joeri jatj de tas van Beppie tiejes de zomercarnaval.

## Döbbel gelök

Kristel van Chantal van Beurskes is zwanger en ging veur eine echo. Dochter Maeve van 2 ging ouch mèt en ze waas hieël geinteresseerdj: "Hey 'n baby!" wees ze op 't sjerm. 't Óngerzeuk ging vlot en Kristel kreeg twieë aafdrökke van de echo mèt. Sinds dae daag verkondigtj Maeve: "Wae kriege twieë babies!"



## Fout geteikendj

Steef en Carolien höbbe 't hoes van de moder van Sjan gekocht. Oppe verjaordag van Carolien höbbe ze aafgesproke óm 't koupcontract te teikene. Sjan en Hans zitte biej moder in hoes klaor mèt de koffie as Steef beltj: "Zèk, wae zitte hiej in Wieërt biej de notaris, mer die höbbe gein aafspraak inne agenda staon?" "Det kan kloppe," zeet Sjan, "det is gewuuuen hiej in Èll". "Wae meindje biej de notaris. Mer den kómme wae d'r aan. We zeen waal get later", zeet Steef bedremmeldj.

Wie ze binnekwome lachtj Carolien: "Jeh, det haje we nateurlik kinne wete, det det neet biej de notaris waas! Veur 't koupcontract van ós eige hoes höbbe wae dalik ouch biej ós toes aafgesproke." Oeteindelik bleek det Hans de aoj versie van 't koupcontract haaj oetgeprintj. Nemes haaj ouch mer get gelaeze en gewuuuen óngerteikendj.

Dus staags d'r nao heet Hans ein extra rondje gemaaktj, zoeëdet ederein zien handteikenning op 't juuste document kost zètte.

## Linders kwekerijen zeen



Ouch veur  
al uch  
**roeëd, gael**  
blome, mèt  
**greun**  
blajer móos  
se bie

## Copy Paste

Kim Corsten wérktj biej Daelzicht in de gehandicaptezurg. D'r sting 'n dagje Efteling op de planning mèt heur cliënte en collega's. Kim haaj zich hieël verheugdj op de Baron, ein gave achtbaan dae ein aantal kieér euver de kop geit. Einmaal inne Efteling waas d'r nemus dae mèt Kim mèt durfdje de achtbaan in. Kim most en zoeëj gaon, mer ging echt neet allein zoeë lang inne wachtrie staon. Kim is neet veur ein gaan te vange en gedroog zich plots wie ein van heur cliënte: Mèt get gekwaek en get biezunjer gedraag lete ze heur vast waal veur gaon...



**Henderikx**  
Vastelaovendj Samé!  
UW GROENE  
vakwinkel

Weverstraat 5A 6013 RA HUNSEL Tel.: 0495-786807

ALLES VOOR DHZ. TUIN & DIER

## Ein zwaor bevalling

Nao eine zwaore aovendj bie de sleuteluverdracht veuldje Yvette zich sangerdaags neet hieëlemaol good. Thoesblieve deej ze neet. Inne café trof ze Nicole die zwanger waas en zagt: "Nicole, ich bin monogaam aan dich, ich gaon onnog efkes neet aan de alcohol."



## WEURDJE VAN AOD-PRINS MICKY I

# De Kwakel

Leef Moeërebuuk, vanoet 't Kwakelcomité kreeg ich de vraog óm 'n stökske te sjrieve euver wie wae de vastelaovendj belaefdj höbbe. Wie mós se det noe doon, en woeë geis se beginne. 't Waas namelicik onbesjriefelik! Vanaaf 't moment det wae zeen gevraogdj, is ós hert allein mer sneller gaon kloppe! De ieëste veurpret kan beginne. De geist ein veur ein de adjudante vraoge, det waas mega sjiek óm te doon. Versjillendje kieëre 'n weekendje wèg mèt 't gevolg, óm alles ins good door te kalle en stiekem al te geniete van dees biezunjer momente. Vanwege corona höbbe wae alles mèt 'n jaor oet mótte stèlle, mer wae höbbe waal 'n jaor extra veurpret gadj mèt ós hieël gevolg! De spanning veur 't oetrope en det den 't groeëte moment eindelik dao is... As se bove oppe buhne steist en de kriegst de scepter, geuftj det 'n geveul van trots. Dich moogs veurop gaon in dit geweldig dörpke! Mer doe kóns allein mer veurop gaon as d'r ouch emes achter dich aan kumtj. Daoeur wil ich uch allemaol bedanke, want echt ederein, jónk, aod, groeët of klein, heet d'r alles aan gedaon óm d'r 'nne geweldjige vastelaovendj van te make. Wae höbbe genote vanaaf 't oetrope tot aan 't verbranje vanne scepter. Veur ós zitj 't d'rop, wae kónne trök kieke op 'nne fantastische tied. Wae hope det de volgendje Prins, same mèt zien gevolg, net zoeë kan genete van alle enthousiaste Moeërebuuk in ós dörpke, zoeë as wae det höbbe gedaon.

Leef Moeërebuuk, ich kan 't nog waal 100 kieér zègge.  
Vanoet de grondj van ós hert, DANKJEWEL!

Groet, Aod Prins Micky I &  
Prinses Sofie



## Weem kintj Ollie?

Femke Wulms is aan 't wérke in Meijel wie de telefoon euver ging. Belaefdj numtj Femke op. De vrouw aan de angere kantj van de lien, ein echte Meijelse, zeet "Ik heb een brief van ollie gekregen...". Femke dinktj hel nao, mer kan zich toch echt neet herinnere det ze ein collega mèt de naam 'Ollie' heet. "Sorry mevrouw, ik werk hier nog niet zo lang, maar volgens mij werkt hier geen Ollie." Det Meijels dialect is ouch lestig, Femke.



## Mieërdere weeg gaon nao Baoxem

Henri en Daniëlle haje noewe fietse gekochtj en wore dao hieël blie mèt. Daniëlle waas oppe fiets wérke in Baoxem en wie ze thoës kwaam waas Henri nörges te bekènne. Det is raar, dacht Daniëlle, want de auto steit gewuuuen oppe oprit. Daniëlle beldje hum op en vroog woeë det hae örges waas. "Nou, ich staon aan de rotonde in Baoxem op dich te wachte!" Henri woeëj heur verrasse, mer wist neet det zie altied binnendoor fietstj en gaaroet neet in de buurt van de rotonde kumtj.



## Ich höb 'n träöt

Vastelaoves dinsdig verzameldje Prins Micky en zien gevolg bie de Prairie. In optocht trochte ze richting Joeri veur 't aaftræje. Ónger 't genot van 'n valse noeët van 'De Koalderinne', gevormd door de vriendinne van Prinses Sofie, waerdje ze de gooie kantj op geträötj. Óndanks det 't muzikale talent wied te zeuke waas, zörgdj ze veur eine lach op eders gezicht. Volges Rick Maes wore 'de Koalderinne' ouch waal de Hieëpe in 't zoor.

## Neet poetse mer lulle



Wouter en Shania höbbe ein hoes gekocht en veur en nao kumtj d'r get bezeuk kieke nao 't noewe leefdjesnëst. Zoeë ouch dae zaoterdig. De femilie van Shania zooj om 13.30 oor kómme. Wouter most en zooj oppe tied klaor zeen en klusdjé zich hieëlemaol in brandj. Alles woort gepoetstj en de veurdeur spinnewebvrie gemaaktj. Ein bietje op tempo nog efkes gauw twieë half vlaje bie de bekker gehooldj, terwiel de angere thoes de vloer nog ein boenbeurt goof. 13.29 oor...precies op tied klaor! Nao drie kwarter gewachtje höbbe, keke

ze toch veur de zekerheid mer efkes oppe kalender. Dju, ein waak te vreug! Snel de vlaai inne diepvries en de rest van de waak oppe Craenestraot slaope, zoeëdet we neet opnoe hove te poetse.



van den Eertwegh  
Tegel & Natuursteenwerken



## Wisj dj'r al..

- det aafgeloupe zomer bie Maastrichts Mooiste veur Rick gerendj waerdje.
- det d'r toen door ein aantal toppers hieël völ geldj opgehooldj is veur KWF.
- det Jill Timmermans toen ouch mètdeej en op het allerlèste moment nog hieël völ anonieme donors kreeg.

# De Kwakel

## Mama!?

't Waas weer tied veur 't jaorlijkse SPIEJE-weekend. D'r moste ein aantal specifieke items mètgenomme waere, vandao det er ein inpakliestje bie de oetnuuediging zoot.

Noud Steuten oet Kelpe waas net op zichzelf gaon woeëne in Èll. Noe zien mam de tas neet mieër in kos pakke, waas zo'n inpakliestje waal welkom. Ze haje allein waal efkes ongerökse en zök op het liestje mooge zetten, den haaj d'r die neet in de Ardenne hove te koupe...




CV DE MOEREBUUK  
Jaorgank 59



**Koolen**  
**De Echte Bakker**

## 11 VERSJILLE



## Witte wel?

Vastelaoves-dinsdig is aangebroke en Jean van Pietje zitj samen mèt Anouk ane bar. Ane angere kantj vanne toog waerdj flink gezweijdj door Tonny. Tonny is wie anger jaore gans in 't wit verkleijdj en geschmincktj. Jean herkèntj Tonny neet en vreugtj aan Anouk: "Zèk, weem is det dao, dae aant zweije is?" "Jeh, Witte Tonny!" zeet Anouk. "Det wit ich inderdaad nie, maar witte gei 't?"

Technisch Opleidingscentrum ZUID

Technisch Opleidingscentrum Zuid BV  
Ellerweg 17  
6037 RR Kelpen-Oler  
T 0495-794560  
W technischopleidingscentrumzuid.nl



## Doeëdse stildje

Kevin Creemers en zien vriendin Anouk, ginge same nao '14 de musical', ein veurstèlling euver 't laeve van Johan Cruijff. Ze zote al inne zaal wie Kevin hel op aan Anouk vroog: "Zèk, kumtj dae Johan Cruijff zelf eigenlik ouch?" En laot 't net op det moment, moesstil zeen in de zaal...

## Wisj dj'r al..

- det Mitch van Hugten en Cindy op kraamvisite woeëje gaon bie Leon Hendrikx en zien vrouw Maud.
- det Maud trökappdj: "Gae moogtj gröstj langskómme, mer wae höbbe geine baby."
- det Cindy 't berichtje nao Maud Verstappen, de vriendin van Joost de Louw, haaj gesteurdj in plaats van nao Maud van Leon.
- det Leike ging sollicitere bie 't Laurentiuszekehoes in Remunj.
- det hae behuuerlik zenuwechtig waas, mer det 't gesprek hieël good verleep.
- det hae zich zoeë drök haaj gemaaktj det t'r nao 't gesprek wegreej en bie de slaagboum d'r achter kwaam det hae 't kaertje nog móst betale.
- det Fermate ein Spaans woord is
- det 't 'stop' beteikendj
- det Fer lekker waers is en zich hie niks van aantrèktj.



# Wichterkal

Chantal beldje mèt Kristel, die heur vertèldje det ze wore gaon zwumme. Maeve (2 jaor) lwoejj och effe belle. "Vertèl ins aan oma woeë we gewaesj zeen." Zeet Maeve: "Bie de Albert Heijn."

Sofie (8 jaor) zeet: "Mam, ich vinj get hieël ónieërlijk. Oma maag mèt opa samewoeëne, dich mèt papa, Cobi mèt Fay, Jeroen mèt Martine... En ich... ich mótt mèt 'nne vreemdje trouwe."

Duuk is verkaodj en zeet tege mam: "Ich dink det Keet mich heet besmètj mèt t hooste en snottere." Keet waas lestig: "Det höb ich neet gedaon! Want ich höb det nog noeëts gedaon, dus ich weit hieëlemaol neet wie det det mot!"

Euverbliemoder Ana vroog aan Stan: "Zo .. ben je al vier geworden?" Zeet Stan (in 't plat) "Nae, veer ....!"

Roan (8 jaor) is aan 't speule bie Duuk. Nicole is dao op bezeuk mèt Kato. Roan en Duuk bewonjere baby Kato en vinje heur mötske zoeë sjattig. Roan zuut drek herkènning en zeet: "Mien naefke Don is gebore mèt ein blauw mötske, want des ein jungske". As d'r hertelik waerdj gelache om dees opmerking, zeet Roan drek: "Des inderdaad gek gezagdj van mich!"

Jochem en Laura woje gaer noew gordiene. Ze wore hieël dudelijk: 't móste effe gordiene waere. Dit snapdje Just (5 jaor) neet, want woeéróm

Guusje Eerkens waas mèt pap en mam oppe verjaardaag van Sjoerd. D'r waas eine baby op komst en Guusje mocht raoje nao 't geslacht, de naam en de geboortedatum. Ze dacht dao ins good euver nao en kwaam tot de conclusie dat de baby Elsa zoeëj gaon heite en huidskleur haor zoeëj kriege.

## Wisj dj'r al..

- det Carolien 't noew hoes van Tonny en Anouk ging bewónjere.
- det ze in de kast keek en hieël serieus zagt: "Deh, höbtj gae de vastelaoveskleier al klaorligge?"
- Wie det Carolien neet begóst te lache, zeet Tonny hieël druueg: "Det zeen mien wirkkleier van defensie..."

Op sjoeël zitte ze in de koffiekamer de wichter op luus te controlere. Lucas (6 jaor) móst effe wachte en zuut oppe moor ein zwart/wit foto en zeet: "Vreuger waas alles zwart/wit." Mer hae bedacht zich innegang en zeet: "Ich geluif det de locht toen al blauw waas."

  
EETCAFE  
**DE PRAIRIE**  
RESTAURANT | ZAAL | CATERING

  
**AT HUIDZORG**  
Praktijk voor Huid- en Oedeemtherapie


  
**Knuffell Bubbel**  
Cobberdogs  
06 230 919 68  
[www.knuffell-bubbel.nl](http://www.knuffell-bubbel.nl)

# De Kwakel



## AMBITIES

Fiene (8 jaor) wètj al wat ze wiltj waere in groep 8: Prinses van de Moerebuuk! Mer as det neet geit lökke den wiltj ze waal butler waere. Later begrepe pap en mam det ze geine carriereswitsch wiltj make, mer ouch genoeghe numtj mèt 't waere van adjudante.



## Waat gebeurtj d'r op dees foto

- A: Èll kirmes heet ein noeue mascotte
- B: 't Bieëst in Jur kömtj nao boete
- C: Gratis knuffele mèt Èll kermis

## ZAAT HERMENIEKE

Tiejes de prinseceptie van Prins Micky geuftj Fanfare Ellona wie gebroekelik ein serenade. Vreugtj Aylin met ein bedinkelik gezicht: "Weem zeen dees artieste eigelik?"



## Oplossing 11 versjille

Moeder Micky - Bein Maud  
- Button jeshke Cas - Joocht is weg - Gillefje Marti - Negel Ans - Spottigheit -  
Tekst en vellop Chantäl - Button hood Nel - Vær Micky - Randj rok Ans

## Ane kal mèt

### Aod-Bontje Aovendj presentator Theo Camp

Ich bén in 2011 begostj as presentator, haaj ein jaor Henk van meister Zef veur mich en daoveur 11 jaor Tjeu van Lemme. Ich dacht det doon ich 11 jaor, mer door de corona waerdje det toet 2023. Dus ich bén neet op mien 60e kónne stoppe, t'rwiel ich det waal 'nne laeftied vinj óm 't stekske aan de jónger generatie euver te drage. Ich vónj 't belangriek óm te zeen wie de artieste gruudje in heur rol of in heur stökske.


De versjille tösse de ieëste oefenaovendj en de generale wore dèk erg groeët. Doe zoogst det d'r hel geoefendj waas. Ich haaj nao 'n paar oefenaovendje al 't idee van dit zeen de stökskes die verdeildj mótté waere euver veur de pauze en nao de pauze. Gein drie knallers achterein op 't inj. Mer ich ging dao neet euver, det deje de regisseurs, Huub en Ruud.

Tiejes de oefenaovendje hooldje ich ouch informatie op bie de artieste. Weem zeetj gae, wie kwoomtj gae op 't idee, kreegt gae hulp, wie kómmt gae aan det sjoeën decor? Den huuerdje ich waal ins van emes: "Vraog mich get nao aafloup van 't optraeje, gaef mich ff de microfoon óm emes te bedanke." Det vertrouwe woeëj ich heur gaeve. De versjille tösse de publieke samestelling op vriedig en zaoterdig zeen groeët. As presentator zuus se de jeugd op heur mobeltje bezig. Die zitte den veuraan get te piele op det dink. Nou, van dae groep kriegs se weinig aandacht as speuler. Dao höbs se den al die aovendje veur geoefendj. As presentator kóns se det respect waal vraoge van 't publiek, mer neet aafdwinge. Ich woeëj noeëts emes kwetse of inne zeik zette. Ich vónj 't sjoeën óm te zeen wie ervare artieste angere probeerdje te helpe. Ein groeëte Bontje Aovendj familie.

Ich probeerdje altied de speulers of de inhoud van heur stökske centraal te stelle. Tjeu van Lemme waas behalve presentator ouch artiest, dae kost de aandacht kriege mèt 'n grap of mupke. Ich höb det neet en mótt det ouch neet gaon probere. Det höb ich ouch tege miene opvolger gezagtj. "Micky, doot waat se dinkst det good is en waat bie dich pëstj."

Nou, as redactie höbbé wae gein vraoge mieér.

Theo bedanktj en Micky succes.



# Oetslaag Optocht 2023

## Einzelgängers

- 16 Micky Hoot de bal inne ploog en oet de gool - Peter Willikens (116,5 pnt)
- 13 Neet zuuver spore - Hub Willekens (115 pnt)
- 7 Man mèt de hamer - Dae van Zeumere (113 pnt)



## Klein groepje

- 8 Wae moge weer los met wae zeen nao 2 joar vastgerostj - De Plekkers (135 pnt)
- 12 Gries mus - De Sjetmusse (128 pnt)
- 1 Man/vrouw mét de hamer - Wae doon neet mèt om te winne...(125 pnt)

## Groeëte groepje

- 11 Hamer of Hieëp -De Moeërehieëpe (129,5 pnt)
- 18 Wae Haoje van Klusse, laot mer kómme die CAMPER busse! - Familie vanne Prins (124 pnt)
- 17 Wae katers zeen neet bang veur de man mèt de hamer! -De Sjrumpelkes (123 pnt)

## Wages

- 14 Wae zeuke ein sjat -VV de Fieëstbieëste (150 pnt)
- 9 Eindelijk eine vervaelersprins, det waas altied ozze wins - VV de Vervaelers (134,5 pnt)

**Knauwelpries:** Optochtnummer 8 - De Plekkers

**Wisselbeker:** Optochtnummer 14 - VV de Fieëstbieëste

**Color Masters**  
premium quality color solutions  
SUIITERIJ VOOR O.A.  
KEUKENS - MEUBELS - BINNENDEUREN - RADIATOREN

**BACHELOR CLUB**  
**ELL** *bie Joeri*

SEBASTIAANSTRAAT 7 • 6011 RD • BACHELORCLUB@KPNMAIL.NL

**FYSIOTHERAPIE**  
PHILIPSEN & MEIJER

# De Kwakel

## Elektrisch oplaje



In Èll kóns se op versjillende plaatse 'nne elektrische auto oplaje. Det kan oppe Niesstraot, ouch in 't Spargelheukske, op 't Scheijmansplein zelfs döbbel en ouch oppe Seringestraot. Dao kóns se bie die de bejaardewuueninge veur minse van alle laeftje op een plaats diene auto voltenke mèt stroum. Ellske bleef de ganse nacht op 't plein staon en de batterie zaat knoeperte vol toen ze smörges nao de SPAR most. Ein paar daag later tenkdje Ellske bie de seniorewwuueninge oppe Seringestraot. Ze vónj smörges ein brefke ónger de roetewisser. Det waas dudelik. 't Is neet de bedoeling det emes oet 'n anger buurt hie ziene auto de ganse nacht lieëtj staon. Minse oet dees buurt mótte ouch de kans kriege óm heure E-auto vol te laje. Ellske tanktj dus mer gewuuen op 't plein.

### Plastic PMD-zek

As Ellske dit stökske sjrieftj, wètj ze nog neet good waat ze van dae ómmezwei van 't PMD-beleid (Plastic, Metaal/blik en Drinkpek) mótt vinje. Zelf bracht Ellske edere waek eine zak nao de Niesstraot (nao de bringveurziening). Ellske knieptj de drinkpek good leeg, alle locht d'r oet en de sjroefdop stevig toedreie. Mer dao wore d'r ouch die in dae PMD-container rómmel duudje. Soms zelf vèrbörstels of verslete handjvaegers. Den waerdje weer 'nne PMD-container aafgekeurdj en most dae bie het restaaafval. Det bracht nik op, 't kosdje zelfs mieér! Dus 't mótt weer angers. Ellske kan d'r neet wies oet waere. In anger gemeindjes grauwele minse det 't noew systeem ratte aantrèktj ómdet minse 3 daag veur de ophooldaag heure zak al boete zétte. Des nik oppe Ellske. Oppe daag zelf, veur 7.30 oor.

### Actueel: De doorzichtige plastic PMD-zek ophole! Hot news...

As deze Kwakel oetkumptj höbbe wae al 'n bietje ervaring mèt de noew PMD-zek-ophool-meneer. Steit nao ein waek al de ieëste plaog van óngedierte veur de deur? Wasesmins genaoje nog aan toe. Det kost hiej waal Nejewieërtj zeen! De zek zeen gelökkig neet zwaor en ze waere good bie-ein gezatte in die buurte woeë de minse zich óngerling good verstaon. Bie Ellske inne buurt is toet noe toe alles good gegange. Wae höbbe via de buurt-app al dudelik weem moezevalle inne graasj heet en weem ein ratteval heet. Effe oppe buurtapp zétte "4 rattekeutels zeen ligge" en Tjeu Geele zal d'r snel biezeen mèt 'n ratteval en 'nne reek. Dao kumtj gein zwerfaafval te ligge. Ellske vertroewtj op 't verstandj van de meiste minse, den kumptj 't good mèt dae PMD-euverlast.

### Buimplan vanne gemeindje

In 2020 haaj de gemeindje 'n good plan en ze höbbe toen alle buim van de ruilverkavelingstied genummerd. Die nummers zeen d'r oetgegruudj en nog mer hie en dao vins se 'nne boum mèt ein laesbaar nummer. Toen Èll in september 't dörp vanne maondj waas, zagt emes tege de ambtenaar: "Bie bounummer 00247 in buurt de Pannestert liktj ein plaatje óm te wete woeë de brandjpöt zitj." Dae gemeindjemins dae kiekt of det t'r water zuut branje en zeet: "Eine genummerdje boum, dao zeen dees bie-einkomste te belangrik veur." Ein waek later waas 't plaatje opgeruumdj, de brandjpöt zuuvergemaaktj en kwaam d'r eine vraogeliest in de noetsbreef vanne gemeindje. Dae kóste de minse invölle en den wist de gemeindje wie ze ein noew (en missjien 'n anger) buimplan koste make. Ellske heet dae liest ingevöldj en deej de suggestie: "Nummertj de buim oppernoew, dao höb se völ wil van."

CV DE MOEREBUUK  
Jaorgank 59



## Ellske

Kritisch, sjerp en oplöttendj. Det is Ellske. Dees aoj tante duit op heur eige meneer verslaag van wat ze zoeë-al hie inne buurt heet gezeen of gehuuerdj.



### Päölkes gezatte in 't perkske bij 't kruuspuntj

Dao heet 'n moder geklaagdj aan de sjaftkieët det d'r völ aoj(er) minse zeen die aan 't Kruuspuntj 't perkske kapotloupe. 30 Maeter wiejer (tegenuver de kirkdeur) is ein zieëbrapaad en dao höbbe de auto's plaats óm te stoppe. Gevaorlikke situatie en mèt 'nne rollator is de aafstap vanoet 't perkske ouch neet gemèkkelik. Dae mins vanne gemeindje bekietj zich det, zuut det die vrouw geliek heet, hooftj in Hunsel 8 päölkes, 'n gróndjboor en 'nne tujerhamer en 'n oor later is 't probleem opgelostj. Noe kan dao nemes mieér euverstaeke. En dao kwaam toch commentaar: "Ze gunne de bejaarde minse mèt rollator nog neet 'n geitepaedje." "t Mót echt neet gekker waere." Ellske huuerdje det d'r moders mèt kinjer zeen die blie wore mèt die päölkes. En ouch ein paar oma's.



## Wisj dj'r al..

- det de vroulje van de adjudante van prins Jeroen I klaedjes haje gekócht en det Jeroen en Josh 'n bie-passendj pak gingé zeuke bie 'Van Tilburg'.
- det Josh, mèt enige tegezin toch 't klaedje van Marianne mètpakdjé, óm te kieke of 't ouch echt matchdjé.
- det ze in dae ganse groeëte winkel gein pak koste vinje, mer det Josh staags d'rao trök is gereje, óm Marianne heur klaedje op te hole.
- det Pem zich aafvroog woeéróm adjudant Jeroen 'n glitter pochetje in zien jeske haaj, t'rwiel de angere twieë ein effe pochetje droge.
- det dit de Prins en zien gevolg zelf nog neet opgevalle waas.
- det toen bleek det Jeroen per óngeluk 't reservepochetje van de Prins vastgeneijd haaj in zien jeske.



## Jeugdprins Tim & Jeugdprinses Lynn

Ich bén jeugdprins Tim de 2dje, 1ste zoon van Marian Orbon oet Ell en Dirk Poels oet Beesel.

Op 11 oktoeëber 2011 bén ich in Mestreech gebóre, en óndanks det Sjengeblood 'nne echte moeëreboek gewóre.

Ich bén 't aodste kindj van de drie, Cas is de middelste en Iris sluujt bie ós thoes de riej.

Ich speul gaer gitaar en haoj van gamen oppe PlayStation, mer bén auch actief bie de scouting in Tungelder en freerun.

Mètdoon mèt de Matties mótt ich dit jaor euverslaon, óm bie de jeugd mèt prinses Lynn veurop te gaon.

Veurig jaor mocht ich al oppe prinsewage en det woor TOP, mer dit jaor staon ich as jeugdprins ein trepke hoeëgerop.

Thijs is miene adjudant, 'nne echte maat, den weurtj 't zeker gezellig en laat.

Ich, jeugdprinses Lynn, bén de jóngste dochter van Roy Steuten en Anke Meuwissen.

Ich bén op 15 november 2011 as Rogstaekerke gebore, en op 't Spargelheukske groeët gewore!

Fay is mien aojer en trotse zus, die zuldjer nog vaker óm mich haer zeen dus!

Volleyballe vinj ich kei sjiek, as 't d'r op aan kumtj bén ich ouch behuuerlik fanatiek!!

Mèt 'de Muuerkes van tegewoordig' inne optocht gingé wae al hieëlemaol los, kei vet waas ouch de groeëte optocht mèt 'Eine chaos'!

Straks staon ich bove-aan mèt Prins Tim oppe prinsewage, dao euver zultj gae mich neet huuere klage.

Mien adjudant Kato kumtj oet Kelpe, mer zal mich hie aan 'nne sjieke vastelaovendj gaon helpe.

*Mèt 'n Mam, oeëts jeugdprinses 'n dörp wiejerop, zitj mich de vastelaovendj inne kop  
En mèt 'nne pap as aod jeugdprins in Beesel, zitj bie mich 't fiëeste in edere vezel.  
Van moder op dochter en vader op zoon, gaon wae 't dan ouch duchtig euver doon.*

*En det alles onger ós motto:*

**De Vastelaovendj zitj ós in 't blood, drie daag fieëste det kumtj good!**



## Weurdje van de redactie.

As redactie zeen wae blie mèt eine herstikke good gevöldje Kwakel. Gae vindtj alle vertroedje rubrieke weer trök in dees oetgave. Wae kónne mèt zien alle trökkieke óp 'n volledig en dik geslaagdj seizoen. En trökkieke dejé wae gaer, mèt en veur uch. Wae hóbbe weer smakelik kónne lache óm alles waat door uch aangeleverdj waerdje. Blieftj det doon, den kónne wae blieve sjrieve. Geniet van de vastelaovendj en wae zeen ós inne kroeg.

De redactie, Anouk, Bo, Bram, Jos, Lieke, Nicol, Paul en Pleun.



Dímielo Design

Website & Shop - Online Marketing - Social Media - Branding

*“Sprakmakende logopedie bij Logopediepraktijk Eva Strous”*

*Garage Heemels*



**Print- &  
Ontwerpstudio  
Leudal**

*De Kwakel is een oetgave van 't kwakelcomité*